



Vn iour de Sabbath Iesus estant en la Synagogue guarit vn Demoniaque, & plusieurs autres languissans.

L E S V S vint en Capharnaum, & entra en la Sinagogue, & le iour du Sabbath preschoit & enseignoit, & les gens s'esbahissoient de sa doctrine: car il enseignoit avec autorité, & d'autre sorte que les Seribes. Or il y auoit en leur Synagogue vn homme possédé de l'esprit imunde, & le Diable s'escria à haute voix, disant: Laisse-moy, qu'ay-je à faire à toy, & toy à moy, Iesus de Nazareh? le sçay bien que tu és le Sainct de Dieu: & Iesus le menaçant luy dist, Tais-toy, & fors hors de cét homme. Alors l'esprit abominable (tourmentant ce pauvre homme, & le iettant à terre au milieu de l'Assemblée, & criant à haute voix) sortit hors de cét homme, lequel demeura sain sans aucun inconuenient: & tous les assistans eurent grande frayeur, & s'esbahissoient, disans; Mais qu'est-ce cy? quelle est cette nouuelle doctrine? quel est ce fait digne de recit? car en puissance & vertu, de sa propre autorité il commande aux esprits immundes, & sont contrains de luy obeir. Or sa renommée courut incontinent par tous les lieux; & Iesus alloit par tout le pais de Galilée, endoctrinant le peuple en leurs Synagogues, & preschant l'Euangile du Royaume celeste, & guarissant de toute langueur, de sorte qu'une grande assemblée de peuple le suiuoit.

S. Matthieu Chap. 4. S. Marc Chap. 1. & 5. Luc Chap. 4.